

OMUKUETU

No: 7.

Juli.

1955.



**lipango joje onde ji peua uuciga.
sigo aluhe. oshoka ojo enjanju
ljomuenjo guandje. eps. 119. 111.**

OMBIBELI OJE JA:

Momuedi ngoka gua ji, mu. Junie 1955, aakriste ajehe mboka ju uuvite ko elaka ljoshindonga oja mono enjanju enene. Embo euanaua ljomambo agehe olja holoka, Oljo

OMBIBELI ONDJAPUKI MOSHINDONGA JI NETESTAMENTI EKULU NEPE GA LUNDULUUA MOMALAKA GOTANGO GOMBIBELI.

Embo ndika otue li juulukua oomvula odindji. Otu shi shi, Nakambale Kanene naahongi oojakuauo oje li lundulula alihe moomvula donale nokuli, ja mana oshilonga shauo omumvo 1920. Okuza komumvo ngo ka omanjolo ngaka omajapuki oga kala miikaha jaakonakoni no jaanjanjangidi no jaapukululi, sigo pehulilo ljomumvo 1954 "Bibelihangeno lja Britania no ljiilongo" olja mana oku li njanjangidica. Petameko ljomumvo nguka Oombibeli dika oda tulua momapeko ga kola noda tuminua ngashingeji nkuka.

Oshituci shetumo petameko ljomuedi nguka osha ningi ngashingeji oshituci oshinene shenjanju noshehambelero shokutamba Embo ndika lja Kalunga.

OMUUA KALUNGA MUENE OTA POPI OOHAPU DE E TA TI:

"Oohapu doka tandi di ku pe nena ndjika, di nokukala momuenjo guoje. Naa-muoje u noku di longa, noku di ja hokololela, no ngele ua kala megumbo, no ngele mendjila, no ngele to ka lala no ngele to ka penduka po, u noku di mangela mokueko, oodimbuluco, noshipalanjamba she endjelela pokati komeho nomeho, noku di njoolela miikulo jomuelo guegumbo ljoje no muujanda."

5 Moses 6:6-9,

Opo ngashingeji otua guana okuimba koomuenjo detu adihe:-

Uujamb' uunene tse tu na,
kau na mpo tuu hulu.
Kalunga muene kue tu pa
elago ljomegulu,
oshoka e tu tumine
oohapu de do opala,
odoka de tu lombuele,
Kalunga te tu hala."

Eimbilo 151: 1.

OTATU KA LANDENI PENI OOMBIBELI DIKA?

Oombibeli doshindonga inadi ja natango odindji. Ihe dimue oda tuminua nokuli momagongalo agehe gokOuambo kavango. Na aluhe nge tapu ja oompe, nado uo otadi tuminua akuhe nkoka ku naakriste aakuetu mboka ja hala embo ndika.

Ombibeli oji nomapeko omaluude ga kola notaji pula iicilinga 5/6

Ongoka ua hala u ilandele Ombibeli ndjika kOuambo, inda koshinjangagongalo shaandjeni. Ngele ito aada mo omambo ga guana, gandja edina ljoje u injolice ko, opo u mone ombibeli, uuna tadi ja isheue.

Aakriste mboka mu li kUushimba: Puleni Oombibeli dika kaahongi aanduisi ja Rynse Sending. Ojo ngele taa njengua oku mu kuaca, nenge itamu ja mono, tumeni kOniipa ofuto jOmbibeli 5/6 nocilinga jimue joposa, ano ajihe kumue iicilinga 6/6 mu "posorder", one no tamu ka tuminua Oombibeli deni moposa, Inamu vulua okutegelela, nando pamue itamu di mono nzi ja:

Omukuetu Juli.

ESIKU ENENE.

Mehistori ljongerki kehe omu nomasiku gamue omanene ngoka itaga vulu okudimbiua nando esiku limue. Mehistori ljongerki jetu esiku lja simana oljo eti 9 lja Julie 1870, uuna aahongi jotango ja ciki Ondonga. Sha shoka rashi ka ningua komeho, esiku ndjoka itali kucua esimano ljaljo. Esiku ekuauo lja tja ngaaka bljo ndjoka, ljeshasho ljaandonga jahamano eti 6 lja Januari 1833, oshoka opo mpoka pua dikua egongalo jotango kOuambo. Iininguani a iinene ja landula ko ojo okuholoka kuEtestamenti Epe moshindonga omumvo 1903 nomoshikuanjama omumvo 1911 eja pulo ljaasita jotango omumvo 1925 nolueendo luomuhongi Narhi kOkavango omumvo 1926.

Ngashingeji otua mono isheue oshini-ma shoka shi nokudimbulukiua aluhe mehistori ljongerki jokOuambokavango, sho tua mono Ombibeli ajihe joshindonga ja njanjangidua ku England omumvo 1954 noje ja nkuka mu Junie 1955.

Ongerki ndjoka inaji mona natango Ombibeli ajine ja lundululua melaka ljaajo, oja fa okanona nkoka inaka toja. Iikulja jajo jopambepo oji noku ji kongu mu jinangerki. Aatumua aakuilongo oje noku ji tolokela oohapu da Kalunga, nenge odi nokuleshua momaiaka goshikuilongo ku mboka je ga shi.

Ihe shaa tuu Ombibeli ja holoka melaka ljaakuanegongalo, nena kehe onuntu ngoka e shi kulesha ota vulu okuipalua niikulja mbjoka itaji hulu po. Omukriste kehe ota vulu okuileshela oohapu da Kalunga koombinga adihe okuza ku Genesis sigo kEhololo. Oojene jomagumbo otaa vulu okuleshela aanegumbo jao. Omulongi kehe ota vulu okuleshela aalongua je, ojo notaa uvu ko nando ja kale aatamekielela. Aauuvici itaa pumbua okutula ue ooteksti doka di li mEtestamenti Ekulu. Uujamba ueihololo alihe lja Kalunga ova patululua komeho gaajehe.

Onkee ano otua ningi naua, sho tua gongala oongundu oonene miituci jehambelero, tu pandule Omuaa omolu omagano ge cike mpaka. Mpoka Oombibeli tadi landua, aakriste ajehe naa endebele okuimonena omambo ngaka ge vule omambo agehe. Omboka je nuupu okumona Oombibeli, naa sile uo oohapele na mboka jokokule oshimpuiju opo ja peue uo omambo gau.

Kape nelundululo ljaa nomapuko. Uene otaga monika moonkambadala dotango melaka ljonjumba. Onkee itashi tu kumica, sho tatu ga aada mOombibeli dika uo tue di mono ngashingeji. Ihe ogo itage tu imbi okuuva shoka Kalunga a hala oku tu lombuela moohapu de. Ngele omambo ngaka gotango taga pu po mbala okulandicua, nena otu neegelelo euanaua ljo-kumona uo mbala omape ga pukululua.

Onkee ano: Tu ilandeleni Oombibeli dika! Tu taandeliceni Oombibeli dika! Tu hambeleleni Kalunga omolu Oombibeli dika! Tu landuleni eui lje, sho te tu popica mOombibeli dika! Nena Oombibeli dika otadi ningi ejambeko enene kutse.

EGALIKANO.

Omuaa, ulukila ndje ondjila joje, ngu pe ndje ehalo okuenda najo. Amen.

ONKUGO JOKU MAKEDONIA.

Aaleshi jOmbibeli oje shi shi, onkugo joku Makedonia shoka taji ti. Otaa dimbulukua omujapostoli Paulus nkene a mono emoniko, manga a li ta uuvica evangeli mu Asia Eshona. Oje okua mono omulumentu omueuropa, guoku Makedonia, a cikama puje noku mu indila: "Taagulukila, u je ku Makedonia, ngu ke tu kuace!" Paulus okua dimbulula, Kalunga muene e mu icanene ngeji ku Europa. Onkee oje okua taagulukila mbala efuta nokua tameke oshilonga shetumo mu Europa. Ando oje ina matuka onkugo ndjoka joku Makedonia, ando ongiini?

Pua piti oomvula odindjidindji, aajeuropa uo ja tameke okuuva onkugo daapagani jokombanda jomafuta. Aakriste aasuomi oja aadika keicano lja zi kOuambo lja ti: "Taagulukeni, mu je nkuka, mu tu longel!" Aasuomi noja vulika keicano ndjoka. Ando ojo inaa matuka onkugo ndjoka "joku Makedonia", ando kOuambo oku li ngini ngashingeji?

Aakriste aauambo oje na tuu omakutsi gokuuva uo "onkugo joku Makedonia"? Eeno, ojendji oje ji uuvu. Oje ji uuvu taji zi peni? Ojendji oje ji uuvu taji zi kombanda jongamba. Aauambo aakuauo otaa iigida taa ti: "Taagulukeni, mu je mu tu kuace!" Aakulupe mboka ja vuulua upagani osho taa icana aatekulu jao aakriste. Aagundjuka aapagani osho taa kugile elongo ljombili.

Nando etaagulukilo ndjoka oljo edigu, ongerki jaaambo itaji vulu okukala ju uuvite ombili, manga omaimbo ngoka inaga kandulua po. Oohapu devangeli odi noku faalelua mboka je di juulukua moluhepo olunene. Aakriste ajehe oje nokupulakena ano onkugo ndjika "joku Makedonia".

Ihe ope na uo onkugo onkavo taji zi komakuti pokati kOuambo nokOkavango. Oku nomazimo gaashitua ja Kalunga naakulilua ja Jesus Kristus mboka jeli natango momilema cokocoko duupagani. Ojo inaa uuva natango oohapu dehupico. Ngika oje kaje shi ku di juulukua nokuli. Ihe Ombepo Ondjapuki ota kugu omolua: "Pendukeni mu je mu ja kuace!"

KOuambo nokOkavango oku na jamue mboka ju uuvu onkugo ndjika noja dimbulula, aakuankala jomokuti ojo "Makedonia jetu". Ihe ojendji inaje shi dimbulula natango. Jamue otaa jematele uudigu uelaka ljaajo, oojakuauo otaa ti, pe nuudigu okuuvica aajendaguli mboka kaje nomutumba gua kola, oojakuauo otaa limbililua nokuli, ngele mbejaka ja guana shili okuuva ko evangeli ljehupico shoka tali ti. Omalimbililo ngaka agehe inaga za meitaalo. Eiraalo otali itaale mbala eicano lja Kalunga puaa nomalimbililo.

Jamue otaa ti, otse otu naapagani ja guana momikunda detu; itatu pumbua okuja komakuti gokokule oku ja kongu. Eeno, nopopepi ope nojendji mboka inaa itaala Kristus natango. Omolua shike oje li po ojendji? Omolua shoka, aakuanegongalo ajehe sho inaa kuatua kombepo jetumo. Ojendji oje li natango mepuko ndjoka enene, sho je shi oshilonga shetumo otashi longua kaatumua aasuomi nokaalongihapu jamue aauambo ojo ajeke. Ehokololo ljo-kubokolola Kristus nehupico ndjoka li li muje oli li pokumuena komikunda dokO-

uambo. Omboka taa tiua "aakuanegongalouala" oja dimbua, najo uo oja icanua ja kale aahokololi jeso nojejumuko ljoMuua.

Oshilonga shopopepi itashi zimbulua, nando aakriste ja penduke uo okukuaca mboka jokokule kashona. Ojo kaje li kokule nokuli. Ojo aashiinda shetu. Omakuti gaakuankala konjala oga kondekua ngashingeji komagongalo gokOuambo nogokOkavango. Otse ngele itatu ja hangene oku ja faalela evangeli, olje andola e shi ninge? Otse tuu mbaka otu nokupulua esiku lja hugunina, aashiinda shetu mpoka je li, ngele natango itaa aadika mongundu jaahupicua.

Etumo lja Paulus olja landulua ketumo ljaajeuropa. Ngashingeji ecimbo olja cikana, etumo ljaajeuropa li landulue ketumo ljaa-jafrika, oljaauambo uo. Onkugo joku Makedonia oji nookuuvika komukriste kehe. Ooitaali ajehe oje noku ji matuka. Oongamba adihe, na doka doludi nodelaka odi nokutaagulukua koonkondo deitaalo nodohoole.

Aakriste jokOuambo nojokOkavango! Inatu kaleni tu uuvite ombili, manga inatu igandja moshilonga shika shetumo, manga inatu matuka onkugo joku Makedonia!

EENDJOVO DOMUENJO.

1 Joh. 1: 1-7

Moteksti ei jetu omuapostoli Johannes ta udifa eendjovo domuenjo, odo Jesus Kristus, opo ovaleshi jo ve uje meendafano na Kalunga na Jesus Kristus (outukulua vanini 1-4). Opo va kale meendafano eli ve nokuenda moujelele nokuhepaulula omatimba ku oo hatu koshua nohonde ja Jesus (outukulua vanini 5-7). Pandjovo ei tua hala okutala kanini oinima itatu: 1. Eendjo domuenjo, 2) Eendjovo domuenjo di nokuudifua, 3) Eudifo letu nokukalamuenjo kuetu.

1. Eendjovo domuenjo.

Mounjuni uopaife omu na eendjovo dihapulela, u jadi ndo eendjovo. Ofje vene hatu popi eendjovo dihapu nohatu udu jo eendjovo dihapu. Ovañu ohava popi nohava popi. Vamue ohava popi eendjovo dongaho, vamue ohava popi eendjovo dou nongo uounjuni ou navamue ohava popi omalongo ve a ninga. Osho jo okua li mounjuni uovaapostoli. Vahapu va kenda-bala okupukifa ovañu neendjovo davo opo va efe eendjovo da Kalunga. Medina lee-ndjovo da Kalunga va udifa omaunongo avo vene. Moluasho Johannes a li e noku-kumaida ovakriste nomukanda uaje mu ou oteksti jetu ja kufua mo. Johannes okua li a hala okuulikila ovakriste eendjovo domuenjo dashili odo okue di shanga nale nokuli mevangelii laje. Paife a hala okupameka evangeli olo laje eshi ta shange:, Eshi sha li komesho jeshito lounjuni (tala Ev. pa Joh. 1:1), eshi tua uda (ondaka ja dja meulu Matt. 17:5, Mark. 9:7 "Ou omona uange omuhoolike" nomalongo a Jesus muene kovalongua vaje), eshi otua mona nomesho etu, eshi tua tala (Johannes novalongua vakuao va enda na Jesus nova mona oilonga jaje nova tala oshinge shaje), ndele eshi tua kuma nomake etu (tala Luk. 24:39) osho hatu shi udifa" Evangeli la uaha okuitavelua olo eendjovo domuenjo handi udifa Jesus ou a enda novalongua vaje a fja no a njumuka no a londo meulu. Aishe

OSHIKOLOLO SHOMEGUMBO

EGALIKANO LJOMUUA.



EHA LJOMBIBELI MOMAGUMBO.

Ngashingeji otua mono Ombibeli jetu. Kaji shi ue Etestamenti linue. alike, aue, agehe gaali omo ge li. Otua mono ngeji omujenda omupe a simana, te tu popica noohapu da Kalunga muene. Otu mu pe ano eha lja tja ngini momagumbo getu?

Ndi shi, Ombibeli jetu oji noku tu cindikila, ngele tatu ji komambo nenge kongundumbibeli. Nando napu tumbulue oohapu dopenipeni, mooprofeti nenge mu Exodus, otse itatu njungua ue oku di kongu. Adihe omo di li.

Omunegumbo kehe ngoka e shi kulesha oti ikongele Ombibeli je, e ji ileshele uo oangulangula jesiku kehe, nopomacimbo omakua uo, uuna ta mono ompito. Nando na leshe mo ontopolua ju uuda esiku kehe, oje ota pumbua oomvula ndatu, a leshe Ombibeli ajihe okuza petameko sigo pehulilo.

Ihe omunegumbo omukriste nge ti ileshele ashike oohapu da Kalunga, osho inashi mu guanena natango. Oje e noku di leshele uo aanegumbo je. Aakuluntu mboka ji inekelelua ku Kalunga egumbo nolualo naalelua, oje nokusila egumbo lja uo oshimpuiju miinima jokomuenjo uo. Otashi vulika, megumbo mu kale mboka kaje shi kuileshela natango. No nando ajehe ja kale je shi shi, onkene tuu tashi pumbua ja gongalele oohapu da Kalunga, je di pulakene pamue jo ja galikane uo pamue. Osho otashi koleke uukumue uopakriste megumbo. Oshinima shika otashi tumbulua nokuli pehokanico kehe, sho taku tiua: "Oohapu da Kristus nadi kale du udilila mune; nadi kale oonjeka doompadi deni; okugalikana pamue naku mu mangele kOmuua, no naku mu mangele uo kumue." Oohapu dika inadi lombuelua mboka jaali ajeke, aue, odo otadi: oopalele uo egumbo alihe. Oojene jegumbo mboka tas leshele olualo luauo oohapu da Kalunga, otaa guanica ngeji kombinga jimue oohapu doka je di lombuelua kokushashua kuomunona kehe, ojo sho ja kumagidua, je mu tonatele, opo „a putudilue meitaalo no mokutila Omua, je a nongekue okutseja omalongo guukriste, opo a diginine esilohenda, moka a taambe-lua meshasho ejapuki."

Aakriste oja pumbua okukumagidua

jaa ece ooadaha domomagumbo. Aanama-gumbo ojendji otaa kambadala okuipopila moshin mi shika notaa ti, ojo kaje shi aa-uuvici. Ihe oandaha jomegumbo itaji pumbua euuvico. Oohapu da Kalunga muene odo oombuanaua nodi noonkondo di vule oohapu domuntu kehe.

Onkee osha guana naua, muene guegumbo nge ha gongele esiku kehe aanegumbo je ajehe no te ja leshele oshitopolua shimue shomOmbibeli, notaa galikana ihe pamue. Andola shika sha digininua momagumbo agehe gaakriste, ando inatu pumbua okusa oluhodi nohoni omolu oondjokana odindji da teka nomolu aagundjuka ojendji ja punduka.

Ongoka ita pungula Ombibeli je muule moshikeca she, ihe ote ji pe eha lja simana megumbo lje, oje ota ka mona eja mbeko olindji. Oshoka nkoka ku noohapu da Kalunga, oko ku na uo Kalunga muene nOmbepo je Ondjapuki. Na nkoka ku na Kalunga, oko oku nutjamba ihau kulu pe.



He ta longo ojana je okugalikana.

Bernhard, omulumentu omujuuki, ngoka kua diki omumvo 1115 ongulu jaaikaleli

Clairvaux (tashi tumbulua: klervoo) koshilongo shaatransa, okua guebele kegalikano lJomuua omatumbulo gamue, opo a dimbulukue naua oondunge daljo domuule. Oje okua ti ngeji: -

Tate jetu -

omolu oonkondo domushiti,
omolu oshilonga shesilohenda,
omolu uule ueuiliko -

ngu u li megulu -

koshipangelapundi shoje,
kegumbo ljaamuoje,
koshilongo shomajambeko goje -

Edina ljoje nali japulue -

komadiladilo goomuenjo detu,
koohapu domakana getu,
kiilonga jiikaha jetu.

Oshilongo shoje nashi je -

oshohenda oku tu uudica,
oshoonkondo oku tu gamena,
osheadimo oku tu zaleka.

Ehalo ljoje nali guanicue -

melago nomuudigu,
meloolo nomoluhepo,
momuenjo nomokusa -

kombanda jevi uo, ngashika megulu -

putse ngashi paajengeli:
nehalo euanaua nokuendelela, nuudi-
ginini,

puaa nengungutulo neimbo nomakoto.

Tu pa uo nena oshicima shetu shesiku kehe -

opo omalutu getu ga palucue,
opo oomuenjo detu di kolekue,
opo oompumbue detu di guanicue -

ngu dime po oondjo detu -

doka de ku shekica,
doka da hepeke oojakuetu,
doka de tu fala jene moshiponga -

ngashika natse uo tatu dimi po daa mboka ja jono kutse -

omboka je tu etele oshiponga shokolutu
omboka ja hanagulica po omaliko getu
omboka ja shekica omadina getu -

ngoje ino tu fala mehongololo,

kombinga juujuni uuinaji,
kombinga jonjama haji tu fala po-
mbambo,

kombinga jondiaboli he tu sile efupa -
aue, tu hupica muuinaji -

dima po mboka tue u longo naale,
uuca mboka uongashingeji,
kandula po mboka tau ja.

Oshoka oshilongo oshoje, noonkondo odoje nesimano oljoje -

u uilike ngu pangele ajehe,
u uuce ngu guanice ashije
mu ajihe, ku ajehe, ongoje auike mu
ajihe -

aluhe sigo aluhe -

ongashingeji,
omuuujuni mbuka,
omuuujuni tau ja -

Amen!

Ngashi to ti, osho shi li,
ngashi to uuvaneke, osho otashi kala,
ngashi tatu indile, osho nashi tje,
Omuua!

Oshikololo shaagundjuka.



LUNONA TAU KONDJELE
OSHILONGA SHOMUUA

Efano ljauo to li mono mpaka. Ojo jomoshilando sha Pöri. Edina ljongundu TOIVONTAHTI tali ti: onjoci jetegameno. Ojo je netegameno nojo uo nando aashona ja uape okulongela Omuaa Jesus nokukuaca oshilonga she shetumo. Etegameno ljauo inali kala osima. Taa gongala lumue moshuuke mokuhondjela etumo. Taa tungu uo uunima ui ili no ui ili, ngashi uumbamba uushushu. Miigongi jauo taa galikana, taa lesa oohapu da Kalunga nomahokololo omauanaua e taa imbi omambilo gaanona. Lumue momuvo kehe taa hiji aakuluntu jauo naantu jalue uo je je okulanda uulonga uauo. Oshikumici shili,

momimvo odindji da landulacana oja likola iimaliua ojindji shili nuunima uauo eeno, ji cike piiponda ecele (£100) nokuli. Omuiiliki guauo Meme Anna Rinne oku nuupjakadi ouindji mokukondjela okangundu ke. Muumbabagona ua tungua kaanona ota tula mo uujimati ua toolua mokuti no ua galangaticilua mokasuka, aantu no taa landa ihe nenjanju uumbamba uatjangeji. Kehe kamue taka eta uumaliua uushona, ihe uushona nge tau guedelua nuushona oluindji, otau ningi ihe ojindji.

Ohoole ja Jesus taji ciminike omuiiliki nuunona mbu. Ongoje u uape ando okuninga shike, oshilonga shOmuaa shi taandele?

ODILI PENI METESTAMENTI EKULU?

Mpaka pevi ope noshitopolua shimue shomEtestamenti Ekulu. Ngele u shi shi, mpoka shi li, tu njolela ejamukulo u tu tumbulile oramata moka sha kucua nosho uo ontopolua nuutopoluagona (nokutja „ooverse“). Okambapila koje oke noku tu aada, manga esiku eti 15 lja September inali cikana. Oadresi jetu ojo: „Omukuetu“, Oniipa, Pk. Ondangua, S. W. A.

Mua mboka ja jamukula naua, otatu hogolola noshihogololico jaali mboka taa tuminua Ombibeli moshindonga omagano. Kambadala ano; pamue ongoje tuu to ke ji mona!

Oohapu doka di nokukongva odo dika. -

„Oshoka tala, ongame otandi shiti egulu epe nevi epe. Mbijaka jonale ihaji dimdulukua ue, no ngashi kaku na ngoka, te li idiladilile momuenjo que, aue; otamu ka ligolelela nokunjanjukilua aluhe oshika, tandi ke shi shita.

Oshoka tala, Jerusalem otandi shi shitukica enjanju ljopombanda, aantu jasho enjanju olindji. Ongame no tandi kala nokunjanjukilua Jerusalem nokunjanjukilua pombanda aantu jandje; nomo ihaamu uuvika mo eui ljelilo neui ljetakumo. Omo itaamu aadikile mo okahanona komasiku gamuegamue, nomusamane, inaa cikica andola omasiku ge; oshoka omugundjuka guajehe ta ka sa, e nomimvo de decele, na ngoka, ita cikica omimvo de kecele, taku tiua, oje a tufua omutima.

Ojo otaa kala nokudika omagumbo nokukala mo, taa kala nokutsika iikunino joovinu nokulja iijimati jado; ihaa kunu, nokutunga, jalue ando ja kale mo, ihaa kunu, jalue ando ja kale nokulja iijimati jauo, oshoka ongomasiku gomiti osho taga ningi nomasiku gaantu-jandje. Aahogololua jandje ojogene taa ka uuca ilonga jikaha jauo.

Ojo itaa kala nokuihepeka osima nolualo luauo itaaje lu valele u uusa kuohaluka, oshoka ojo olualo li mboka ja lalekua nuujamba k'Omuaa, nolualo luauo otalu kala pujo.

Manga inajaji icana ndje, ongame tandi ja zimine, manga taa popi, ongame ndu uuva ko.

Embungu nonzigona otadi napele po pamue, onime taji kala nokunapa omuidi, ja fongombe, nejoka, oondja daljo avi; kombanda jondundu jandje ondjapuki kaku na ue okuma, nkoka haku longelua ilonga iuinaji nenge joshiponga, Omuaa osho ta ti.”

Ano oohapu dika odi li peni mEtestamenti Ekulu? Di kongam mo, ngu tu tumine ejamukulo.

4. Omunongekua.

Tua hala tu ilonge;
menongelo tu je.
Oondunge tu di konge,
tu mon' uujelele.

Tua kala naalenaale
Kalunga katu mu shi,
ongoka e tu hoole;
a gandj' Omukulili.

Omukulili, ongoje
otu ku hoole uo.
Noohapu doj' oontoje
otue di hokua po.

Tu kuaca mokukala,
tse tu di guanice.
Megulu ljoj' lj' oopala
ngoj' u tu cikice.



Omuhongi David Livingstone ta
lesha Ombibeli.



TATU KI ILANDELA OMBIBELI.


O K A A N D J E T U

ei ovaapostoli, ve i mona, ojo oshili. Ndelene evangeli eli tali udifa Jesus itali uanene vahapu. Ohava hovele okuudifa pounongo uavo vene. Osho sha li mounjuni uovaaapostoli ndelene osho jo mounjuni uopaife. Omedina leendjovo da Kalunga ohatu udu taku. popiua oinima i li li noi li li kai nekuatafano nande neendjovo da Kalunga. Eengerki dimue hadi longo omalongo ado a kufua mombibeli va ti ndelene ka e nomuenjo. Ovaudifi vahapu hava udifa nohava fatulula eendjovo da Kalunga ndelene eudifo lavo ka li nomuenjo no itali palula eemuenjo. Mokati ketu omu na eendjovo da tja ngaha dihapu nohadi popiua medina la Kalunga. Ofje tu nokulungama eudifo neendjovo da tja ngaha, hadi di momuñu. Omudifi keshe ne lipule ngenge eendjovo dajje odaje muene ile okue di peua kOmumuene Jesus (1 Joh. 1: 5) Eendjovo domuenjo, odo eendjovo di nomuenjo nohadi u peua kOmueene Jesus. Ngashi ovaapostoli va li va kala pu Jesus ve mu tala nova longua kuje no ve mu pulikina osho jo omuudifi nomukriste keshe e nokukala pu Jesus meilikano, tashi ti e nokuiesha Ombibeli nokuilikana opo a peue eendjovo di nomuenjo. -Ovaapostoli va udifa eshi va mona eshi va tala eshi va kuma. Ofje itatu du'u okutala Jesus nomoho etu noku mu kuma nomake etu ndelene ohatu mu mono meitavelo notu mu udite meemuenjo detu Keshe omuudifi, keshe omulongi, keshe omukuluñu na indile eitavelo eli a mone Jesus manga ina udifa, manga ina longa, manga ina kumaida. Eendjovo dajje esheko alike ngenge ihadi di meitavelo no ine di peua ku Jesus.

Pefimbo tuu eli ihatu pumbua eendjovo dongaho ile eendjovo donongoo uounjuni ou ohatu pumbua eendjovo domuenjo, odo da pumba. Ngoshimati shoshilonga she tumo tu na omu mOuambo eendjovo da Kalunga, da li eendjovo domuenjo, da eta omuenjo mokati kovauambo. Ndelene paife tu nokulungama tu ha kanife eendjovo di nomuenjo tu ha kale ashike neendjovo ka di nomuenjo. Ongerki jomOuambo itai ka kala ngenge ka tu neendjovo di nomuenjo. Eemuenjo dovakriste tadi fi ngenge ka tu neendjovo di nomuenjo. Tu indileni Omueene e tu pe eendjovo di nomunjo.

2. Eendjovo domuenjo di nokuudifua.

Omuapostoli Johannes a mona omuenjo meendjovo domuenjo, odo Jesus Kristus. Oje muene a mona omuenjo ndelene a hala kutja ovakuao va mone jo omuenjo. Moluasho a shanga evangeli laje nomukanda mu ou a udifa Jesus Kristus. Johannes ta shange. "Ohatu mu hepaululile nokuudifa eshi tua mona nashi tua uda, ofje atushe tu, kale pamue ndele tu neendafano pamue na Tate nomona uaje Jesus Kristus." Eshi Johannes a mona okua hala oku shi pa ovakuao jo, a hala avesho va mone omuenjo mu Jesus Kristus. Nomumuenjo ou u li meendjovo da Kalunga. Ka kua li e nehalo laje muene alike okua li e nelombuelo la Jesus: "Indeni mounjuni aushe udifileni ovashitua avesho evangeli." Jesus okua tuma ovahongua vaje va udifile avesho eendjovo dajje opo avesho va mone omuenjo mudo. Molu elombuelo eli la Jesus mOuambo omu omua udifua jo evangeli kokudja keujo la Nakambale nokovakuao. Nevangeli, eendjovo odo da udifua da pa ovañu vahapu omuenjo. -Omukuetu, ove oua mona jo omuenjo? Ondi shi shi oua longua moukriste, ndelene okukala nomuenjo oshinima shi li li. Ove omunelao ngenge



NAKAMBALE kanene moshilonga she shokulundulula Ombibeli.

KUUJAMBA KUA GUEDUA.

OMUKUETU okua li a hala oku'uuva aantu oju uuvite ngiini ngashingeji Ombibeli ajihe sho ja holoka moshuambo, onke okua tumu aakuaci je okufalela aantu jamue Ombibeli omagano noku ja pula omapulo gamue.

Nguka kua peue tango Ombibeli oje OMUENE GUOSHILONGO EINO JOHANNES KAMBONDE KA NAMENE. Omukuluntutumua B. Eriksson okue mu pe Ombibeli noje sho kua je taamba, oja fanekua mpoka, nefano ndjoka tatu ke li njanjanga komeho, shaa tatu li mono.

Oshipala shomukuanilua oshu uud'enjanju sho ta taamba Ombibeli nokuli a njengua okuholola enjanju lje noohapu. Oje a pulua ngele a aadika a juulukua Ombibeli no naale.

Onda li nde ji pumbua shili, omukuanilua osho a ti, onke enjanju ljangje kali noongamba ngashingeji.

Omulundululi guOmbibeli kuku Nakambale, ote mu moño tuu?

- Oje okua putuda ndje nokuli. Nomoshinjanga she, sho nda longua komuana, omuhongi Reinhold, onda li handi mono omambo ge ogendji

Oto vulu tuu okuhokolola omadimbulukico gamue sho mua monacana naje?

- Manga tua li kondjumba onda li nda lika kombua. Opo nda humbatua ku Johannes Shiponeni, nda pangua kOlukonda noko nda longua uo no nda li handi monacana naakriste ojendji manga nda li kOlukonda.

- Ngashingeji sho ua peua Ombibeli ajihe, ou uuvite ngiini?

- Ondu uuvite enjanju. No tandi tala ku Jesus na Tate Kalunga, oje a pe ndje oonkondo oku ji leshe.

- Ou na tuu omukalo okulesha oohapu da Kalunga kehe esiku?

- Osho ndi li. Unene tandi di pumbua pepangulo kehe. - Mpaka omunjoli guomukuanilua, Julius Ngaikukuete, ti itula moohapu doka e ta ti? „Sho nde ja mpaka, onde mu luku Omuevangeliste”. - Nomukuanilua ta tsikile: Shaa tuu tandi ji kuukongo, ohandi pula uutati uandje. Otaa etele ndje ondjembo, ihe ihandi guana, manga inaa etela ndje Etestamenti Epe. - Oshiguana shoje sho sha mono

ngashingeji Ombibeli, oua hala shi kale ngiini najo?

- Nda hala shi ikongele Ombibeli, opo shi ji leshe uo; oljo enjanju ljangje. Nomukuanilua ta hulica oohapu de noohapu dika domOmbibeli: Omua ngele itatungu ongulu aatungi jajo otaa ihepeke ouala, Omua ngele ita langele oshilando aalangeli otaje shi langele ouala.

OMUEVANGELISTE omukulupe Natanael Amukugo kua peua uo Ombibeli. Oje sho ku uuvu OMAGANO, oje okua fa a haluka nokue eca ajihe mbjoka kua li ta longo. Oje sho ku uuvu nokua mono Ombibeli ajihe melaka ljetu e ji peua omagano oshipala she osha li shu'uudenjanju enene nokua njengua nokuli okupopja epandulo lje pecimbo ndjoka. Oje a pulua tango epulo ndika: Enjanju ljoje oli cike peni sho ua mono Ombibeli: ajihe melaka ljetu' nge to li jeleka nomanjanju ue ga mono mokukalamuenjo kuoje?

- Enjanju ljangje enene shili li vulice omanjanju agehe nde ga mono mokukalamuenjo. Ando ndi diladile sho nda l omugundjuka ndi na oonkondo okulonga nokulikola omaliko ogendji ga njanjude ndje, aaue, enjanju ndika lja vulu agehe, mbuka uujamba.

- Ecimbo oli cike peni ua galikana Kalunga nokutegelela ehologo ljuOmbibeli ndjika Ondjapuki?

- Onda galikana ecimbo ele, nonda limbililua pamue itaji ka holoka ue. Ihe ombadilila ouala ja holoka. Ngashingeji otandi ti: Omua laleka ndje nuujamba moohapu doje, oshoka omoho gandja ga mono uujamba u cike mpaka. Kalunga na hambelelue:

- Okuholoka kuOmbibeli oto ku jeleke na shike?

- Otandi ku jeleke nomunona a valua megumbo. Aantu ohaa njanjukua unene nge omunona a valua. Aakulu jonaale ohaa ti: Komuhanga kua guedua; shaa okakadona ka valua. Ngashingeji otandi ti: KUUJAMBA KUA GUEDUA.

- Ando nge to diladila iinenenima jomehistori ljongerki jaaambo, ehala to li jeleke nokuholoka kuOmbibeli olini po?

- Ehala tandi li pe okuholoka kuOmbibeli pamue ondika: ETAMEKO EPELELA. Pamue ngashi etameko ljoseminari, sho ja tameke, okua holoka iijimati iipe ja valua, iijimati mbjoka otaji monika sigo ongashingeji. NDIKA ETAMEKO EPE. Ehologo lja jo shimue shinenenima mehistori ljongerki jetu.

- Mokutala uujamba u cike mpano uoohapu da Kalunga, ongerki jetu jOua mbokavango oto ji tile ngiini?

- Otandi ti: Ongerki jetu ja mono ejambeko enene shili. Naale otua li tua fa uuhanona, ihe ngashingeji tua koko. Kalunga ando a lundulule okukala kuongashingeji je e tu vulikice koohapu de pondjapuki.

Ngashingeji sho u na Ombibeli ajihe megumbo ljoje, oto ji jeleke na shike?

- Ombibeli itandi vulu oku ji jeleka nasha shomuuñuni. Ajihe iijagaja jouala ihe ngashi Omua Jesus a ti: Uujuni otuu hulu po, ihe oohapu dandje kadu na mpo tadi hulu po. Ano mbuka uujamba uashili megumbo ljangje u vule iinima ajihe. Kalunga otandi mu hambelele.

Omutumua guOmukuetu kua dimbulula nenjanju nkene omukulupe ngka - nando a aadika e nuupjakadi ue nokua li e noku-sikila iilonga je jiili uupjakadi ue auhe okue u landakanicapo nokulesha Ombibeli je nenjanju. Uupjakadi ue inau mu imba okukonakona oohapu da Kalunga.

SHITLANGU.

omuna guokombanda

Lja njolua
ku
Andre de Clerc
na
Edoardo Mondlane

Lja lundululua
ku
Hosea Namupala,

Etsikilo.

otamu imonene iizimba nomagadi goku mu pa oshinge. Otamu ka kala mu nesimano kaalumentu joshiguana sheni ngele taje mu mono mua opala ngauo! Na okuhameka oombepo deni, otatu mu longekidile oma viinu ngoka inaamu ga lola nale. Ostola ndjoka ojo - Nkoshi - ombuanaualela, ondjambalela, ji nombililela na oji nombililehalela!

Aakiintu inaa mona nale eulukilo lja tja ngeji. Ihe mboka jongundu jetu oje shi sho taa ningi: Otaa ukilile ostola ja Musa Hamad omutiligane ngoka a li e tu talele po. Sho e tu mono kokule, okua nuka mo e tu tsakaneka noku tu pandule sho inaatu hunjamekua kaahongololi aanastola jomoshilando. Okua ji koshijelekico (oshiviha) nokua eleke po osuuka moshijaha nokua tile mo omeja noku tu pe omboroto tu elele muutoje mbu. Osho naanaa oshijaha sho opalela omukuaniilua. Manga tatu li, omujakuli okua tameke okueleka oofukua. Okue tu ulukile ondando ja shoka tue shi eta; sho ja tokolua elandakanico olja ningua. Ope na ohema taji uelima jomu kiintu kehena - oshikumica oshiuanaa - okakotse kandje okatokele.

Hamukalo guaakiintu jokokule okufala iilongua jauo koostola nokuimonena iimaliua. Ajihe ohaji ningua nopuaa na iimaliua momapingakanico. Na sigo oomvula dimue da piti po, oofukua ouala da kala hadi landakanicua, noluidji omiizalomua. Uuna iinima jaakiintu ojindji ji vule omalapi nenge iikamule mbjo je hole, je nokuguana ngaa na shoka omunastola te ja umbile.

EKAPITELI ETITANO.

Iilalo noonkunda.

Oja topola ecimbo ljauo pokati, okulica iigunda iikombo, okujaka, okuja kuukongo, okukonakona omakuti nokudana omaudano.

Esiku nda ja tango kuusita onda li nde ende omupja. Ihe sho pua piti omacimbo noomuedi odindji da si ko..... ondi ilongo iinima ojindji. Ihandi tila ue Kapokolo: econa ljaandjetu. Olja ningi nokuli kuume kandje, Ihandi kala ue ndaa na odimbo jandje ndjoka nda peua omagano ku Majeriman. Ano Kapokolo ohali simaneke ndje. Kandi shi ue okahanona.

Moshivike sha ji okanzigona ka valelua moshigunda. Majeriman sho e ja ongula ndjono, onda matuka ndi mu tsakaneka ndi mu ulukile uujamba uandje uupe. Okua kumagida ndje ndi cige okanzigona na jina moshigunda esiku limue nenge gaali. Ihe esiku ndjoka Majeriman okua egulula po omajambi gane ngoka ge edila oshigunda nokua piica mo oshigunda ashibe

Inandi lengalenga palue ihe okokanzigona, Majeriman osho uo. Okua ti otaka ningua naji komume nokue ka humbata.

- Aje, Majeriman, hoka okanzi kandjel-
- Ihe, ongame omukuluntu guimuna -
- Majeriman, eca ndi humbate okanzi, okandje.-

Majeriman okua tala ndje nokudina.
- Majeriman, ondi na po onkundenona ontoje. Tu pange uukuume.-

- Onaua, otandi kuca ko iikaha jandje. Ngele ua hala kuhumbata okanzi, humbata. Omoluashike ndi nokuipjakidila na ngoje?-

- Ou li mondjila Majeriman, eca ndi humbate uudigu uandje.-

Okupopja kuandje kuoopala okua siikile einenepeko ljandje. Majeriman okua eca okuhumbata okanzi omolu onkundenona nde ji kuta.

Uufufu uuanaua uokamuna, taka humbata komapepe, oji vule ashihe shokombanda jevi muupu. Uufufu tau injenge kashona noua fa tau - ku njanjuda - tau ku pe ombili! Onzi onzini notaji matuka ponto joje, taji ku finjafinja komagulu, no itaji ku eca nando okacimbo okafupi. Ngoje noto iuvu uunenentu. Ongoje omusita guoonzi shili, ua ningina moshiholekua shiilonga mbjoka. Ope na omauvito omakumici.

Pokadija kamue, uumati umue ujali Mapatulana na Nandulujana oje tu tegelele niimuna jauo, taa ningi ecigacano ljokukajila iikombo. Majeriman okua diladila osho shoopala.

Ihe Mapatulana okua mueneka ndje:

- Shitlangu za po! Uudano mbuka kau shi uumatjona. Ino mona nando okanona ke nomahini mokana, taka kajile iikombo. -

- Oku nomanganga ngiini! Oku nelago shoka omunene nomudigu e vule ndje. Omukatalume! Ehualukula! Otandi mu nukile? Ha ngame, Shitlangu, omahodi gandje ohage ja mbala.

Onaua, osho nga nda ka holola sho te vulu okuninga.

Onda kuca odimbo jandje nonda ji kecona ljandje. Olja jeluca omutse, lja tala ndje, nolja galuka lja hala okumbolokotela ndje. Ihe ngashingeji ongame omusita: okacimbo nkoka lja shuna luanima ondi ikolelele nonda kuata momulengendenge gualjo niikaha, nonda kajile kombunda jaljo. Ohandi ikolelele naua. Kapokolo inda, „econa ngoje”, euinaji koshipala, muujuuki ongomukulupe. Onda ku na! Kapokolo olja nuka, lja matuka lju uka medija, tali huku, tali shuna luanima, ihe ongame omuhona pecimbo ndjoka. Hei, Kapokolo! Hei econa! Onda hiki omuilua ongomusita guongombe Kapokolo olji idingoloka nolja fala ndje ku jakuetu. - Kotokeni! Aamatil Kotokeni! Eciembo ndjoka onda zi ko koshilodomua shandje (econ) nosha canga ndje mondi ihata po. Pecimbo ndjoka itandi diladila ue onkundenona jandje. Aue, ondi nodimbo moshikaha. O, u uete ko ano Kapokolo, osho handi ningi nga!

Ehololo ljandje lja hulu. Okukajila kuandje okua fatulukile aakauili oojakuetu. Onda lombuele Mapatulana:

- Ookacangamatondo ojo uunamuenjo uuanaua. Ohau tuka. Inau fa oongongololo.-

Jamue oja li ja jolo okuihatapo kuandje. Opue ja elunduluko, notua kuutumba kookambe detu.

Nandulujana ngoka a li e etelele okasino okua gu naji. Oshikajilua she shoka sha li sha fa inaashi njanjukilua ohalopa, osha ji nomukauili guasho mengande. Nandulujana okue ka (okasino) denge kejulu, momeho, nomomutse. Ihe okasino oke na omadiladilo giili. Itaka imbua ku sha. Oka njanja natango, ka hualukutule moluhua luomano ga cita, noka ji koshi joshihua. Nandulujana okui imbete po kombunda jako nokui igonjo naua. Ihe okasino oka mono shoka ka li ka pumbua, ka opaleke

OMBIBELI OSHIKE?

Ombibeli ojo ooramata da njolua pomacimbo gi ili nogi ili kaantu ja ladipikua kOmbepo Ondjapuki. Omanjolo ngaka omajapuki oga gongelua ngeji kumue meuiliko ljOmbepo Ondjapuki noga ningi oshipandi shimue sha tiua „Biblia”. Oshitja shika sha zile moshigreka nosha taambua molupe nduka momalaka ogendji, ngashi moshiuambo uo. Ano Ombibeli ojo embo ljoohapu da Kalunga deihololo lje.

Mombibeli otu noombinga mbali oone ne. Jotango ojo Etestamenti Ekulu, moka mu nooramata 39, da njolua okuza ku Moses sigo kaaprofeti. Ooramata dika oda njolua unene melaka ljoshiguana shaa-juda, moshiheberi noda lundululua moshigreka pomimvo 280 manga Kristus iraa valua, omoshilando sha Aleksandria mu Egipti. Elundululo ndika olja simana, oshoka olja tula oohapu da Kalunga melaka ndjoka lja li lja leshua nolja uuvika kaantu ojendji jomuujuni mbujaka. Ooramata doka dEtestamenti Ekulu odo tuu da longicua nope-cimbo ljOmuua Jesus. Konima jefondo lje opua tameke ihe okuholoka ooramata mo-maevangeli guujuni uupe.

Ooramata dEtestamenti Epe oda njolua unene moshigreka. Nando omambo ngaka ga holoka, oga kala elala ele inaga uucua go ipaga tulua kumue nogEkulu. Pomumvo 397 okuza kokuvalua ku Kristus oshigongi shomu Kartago osha tokola nosha uuca omambo ngaka 27 ga ninge oshitopolua shEtestamenti Epe. Moshigongi tuu shoka omambo gEtestamenti Ekulu 39 nogEtestamenti Epe 27 oga tulua kumue noga ningi Ombibeli jooramata 66.

Omambo ngaka oga talua ogo tuu geihololo lja Kalunga lja guanenena nogo omuuci gueitaalo ljomuntu mokukala kue akuhe. Onkee Nakambale Kanene ta ti: „Oohapu da Kalunga odoopalele, nokutja da jeleka omuntu kehe, onke ano itadi indikua nando omuntu, aue, aantu ajehe je nokukumagidua nokuli, je di leshe noku di konakona, ja tseje Kalunga ka shili, jo ja hupicue.” Omuntu kehe muujuni okua pumbua Ombibeli. Onkee ja indjipalicua momalaka ogendjigendji ji vule embo ljo-ludi kehe. Ano ojo shili elaka lja Kalunga ta popi naana jaantu muujuni mbu ua jonana. Ojana jashili otaje mu uuvu mujo. Omujo ano ote tu tsejicile ehala lje. Otse otu noku ji leshe tu mu uuve tse tu tseje shoka tu nokuninga.

Ombibeli ojo embo ljomacimbo agehe taji oopalele ecimbo kehe nepipi kehe. Momacimbo ngoka ga ja, nomu ngaka gongashingeji, nomu ngejaka tage ja, ojo oja uilike notaji uilike nokucikica aandunduila jomombuga odigu juujuni kOmukulili guauo megulu.

Okulundululila Ombibeli melaka ljontumba okuo oshilonga oshijapuki, ihe oshi li po uo oshidigu noshi nondilo. Etestamenti ljetu Epe moshindonga olja holoka omumvo 1903. Aatumua mboka je tu monene oohapu da Kalunga melaka ljetu, ojo ajeke ngika je shi shi, uudigu u cike peni mboka ji itsu muuo melaka ndika. Ojo oja li po aakokoli muupagani nomelaka, unene oLakambale Kanene ngoka „oho jomanjolo” goshindonga. Kalunga Tate na hambelelele nokomapi nage ke ja, sho e tu pa oohapu de oondjapuki okokulongica omapenda ngejaka!

Timoteus Andreas

ombunda jako noka umbu ko omukauili guako. Nandulujana okui itoola po, oshipala she okua li sha tsuua, omagulu oga pogonjona, taga zi ombinzi noonkondo. Ndele osha kuaca shike? Uudano uuanaua.

Tadi tsikilua.

OUNJUNI TAU TONGO SHIKE

SUIDWES.

Oshilonga shipe shetumo.

Koumbangalañu ua Suidwes-Afrika oko ongerki jeemburu ja hovelua oshitukula shipe shetumo. Otua hala tu holole ehalelo letu kovamuameme ovo ve udite momitima davo eifano la Kalunga koshilonga eshi. Omaongalo okOtjiwarongo noku Gibeon noku Windhoek otaa kala moshiongalele shetumo oso tahsi ka fila etumo lipe oshisho. Komb'nga ikuao ongerki ja Kaap jo otai ka ninga oikuafalanga nokufila oshisho etameko eli lipe nokujandja £1000 komudo nepashukilo moinima ikuao.

Ngashi tu-shi shi Okajoko oku taku hovelua olo edu la kula noli na oonakukalano vanini. Omo mu na ashike ovaheero novakuangala veeñembuki ava ve li vehe neendjovo da Kalunga notava fi ngaho. Oilonga jehanganotumo la Rynse nola Suomi oja hovelua koumbangalañu ua Suidwes 1842, na 1870. Eshi inava longa mOkajoko ha moluashi inava hala. Ndele ne etandavelo ledu nosho jo omumbue jovalongi nojoimaliva jomahangano okombada jefuta ojo enjamukulo omoluashike edu olo li li natango puffje inali longua. Ova muameme ovasuomi omido edo mbali da ja ova li mu Ohopoho moñele ja Kommissaris. Okua li nokahakulilo omua longa omuhakuli umue, okua li a indilua ketumo la Suomi onge eemuedi dimue okua li e nokushuna koñele javo. Osho ngaha ongerki jeemburu oja jeululilua oshivelo. Eengulu oko di ñnale, ongulu jokukala nokapange lo, da jandjua kongerki jeemburu. Omuhakuli H. van Rensburg okua ja ko ñale nokuli nomuevangeliste Kleopas Johannes oo a jandjua ketumo la Suomi. Nokomesho Eerw. H. A. van Wyk ota ka joololelua oilonga e.

Ovauambo tava aluka ku Union.

Omuministeri uoinima jovadaleluamo okua koleka elaka kutja ovauambo aveshve ve li mu Union tava shunifua ku Suidwes. Itava ka itavelua nande va kale mu Union.

Mnr Viljoen okua ti ope nokuningua sha okukondjifa oudila ava oshiponga shinene shoilja. Ngenge itapa ningua sha itaku tejava vali mOuambo.

Omuministeri uoinima jovadalelua, Dr. Verwoerd ta teelelelua mu Julie mu Suidwes okutalela po ovadaleluamo. Ote ke uja mOuambo jo.

Unie.

Epunga olo omutondi uetu munene. Ovalaule ve fike 15 000 otava fi komudo kepunga.

Epunga olo oshiponga shotete sha hanga edu letu, osho Mnr. Naude omuministeri uoukalinaua mu Kaap a ti. Ofje ohatu hafele ehumoko lohilongo shetu moilonga nomoitopolua joilokolua, ndelene otu nokulungama kutja ehumoko itali ñgundipaleke oukolele uoshuana, Naude osho a ti. Onda diladila epunga ohatu li kombo mo ngenge atushe hatu ningi eshi haru dulu.

Omuministeri Naude okua ti omaudu ngashi oshikoloha noshilundu nomalaria hao vali omadu amatilifi. Okua popja jo elinekelo kutja ombada uokutula epunga otavu dula jo okukombua po. Omuyalu uo-

vafi ovalaule otavu hólola naua oshilonga esho epunga tali shi longo moilongo. Mokati kovalaule momajovi efele keshe otamu fi ejovi kepunga. Onge omualu uovafi mokati kavu ovo 15 000 komudo. Omualo ou ua jandjelua ekondjifo lepunga ovo £2400 000 neudo taku uedelua ko £500 000. Okua popja jo kutja epangelo tali ka jandja kovanaudu uepunga eembete 2 000.

Europa.

Duitsland tashi shuninua elipangelo lasho.

Amerika, Engeland na Frankryk oja ninga omaufomango a pua Duitsland-Ouninginino shi mone elipangelo la uana noshi shunifue oiti jasho. Konjala nana eedula omulongo eshi Nazi-Duitsland she li jandja. Wes-Duitsland otashi ningi shimue shomoshiongalele shovauninginino ovaeuropa novaamerika.

Ongahelipi ovatiliane ve uja okukala mu Suid-Afrika?

Konima jeedula omafele ane Suid-Afrika, edu eli tu li mo, ka la li li na edina nokamua li ovatiliaane. Ovakuangala ova li pu Kaap noungongolo (obushmani) jo noifitukuti ja kula ojo ihai monika vali paife. Osho oshikumufi okudiladila kutja opa li efimbo olo ovatiliaane kakua li ve shi kutja edu letu, oko li li. Oshike she va eta ku Suid-Afrika? Konima jeedula omafele atano kokule kombada jefuta moshilongo, edina lasho Portugal, omua li omona uohamba, edina laje Hendrik, oje okua li e hoole efuta. Oje okua kumaida ovashingiskepa vaje va je nefuta kokule noshilongo shavo, nde pehovelo okua li va tala. Okua li va uda omahokololo oiljani jomomeva, ojo tai dulu okupona ovashingiskepa, nefulukolomeva lomefuta tali dulu oku va shilila moule netango lipju tali dulu oku va laulika navali ka pe na ou e shi ondjila. Omona uohamba Hedrik okua hekeleka ngo ovashingi vaje va ehene ko ngo kanini nefuta nova shune vali keumbo. Molufo lua shikula ova huma ko kanini na kanini nokuladipala. Ovo ova enda alushe nokukuñgula nedu la Afrika. Hendrik okua li a kumua alushe shashi ova li ve nokuenda nde itava hange ehulilo la Afrika. Oje okua fija ine li mona, ndele ovashingiskepa ovaputu ova kala noku mu dimbulukua molua ojo aishve e i va ningile na eshi a tunga eeskepa nokue va kumaida va ha tile omahokololo ovañu oku va tilifa mofuta olo inali shiivika. Ovo ova tokola okuhuma komesho nolundo luomefuta. Ovo ova diladila vali ondunge imue moluashi va hala okuhanga ehulilo la Afrika. Ova diladila kutja ove na okuhanga jo India, edu liua loupuna oko tava dulu okulanda oinima joupuna joshinge. Okua li ve shi shi kutja ngenge tava mono ondjila jokuja ku India otava ka ninga oipuna. Keshe tuu tava mono ondjila joku ku India nena otava ka mona oupuna uouñendi notau fiki diva mu Portugal notau li punapaleke. Eedula omilongo mbali na hamano konima jefjo la Hendrik ependa umue omuputu omuulikiskepa Bartolomeus Dias okua fikama a tale ngenge ta mono ondjila jomomeva.

Bartolomeus okua dja mu Lissabon etulilo lommu Portugal nouskepa vatatu. Kamue oka fiala ondjlakati ope ke va

kuafe kombinga joikulja nge tava aluka. Ovashingiskepa ova li ve nokuladipala ngahelipi okuenda nefuta nande kave shi apatava ji noikukungulufuta ojo i nokushakeneka ouskepa vavo vanini? Ovashingiskepa ovaputu ava ove uja pomulonga umu? kouninginino ua Afrika. Dias okua shiva ne oshitopolua shimue shondjila ndele okua li e na okuhuma ko natango komesho e dule ovaendifuta ovatetekeli vaje. Molueameno okua li ha ende alushe komuñgulo uedu. Eshi a pitilila oñele ope ovaendifuta ovatetekeli va hulila okua tui-kila ngo. Oje okua li e na eengudi dosamañte di noumushijakano odo a hala oku di dika peeñele apa ta tula. Jotete okue i dika mu Angra Peguena ope pe na Luderitzbucht paife. Molu omepo kua li ii ova kala omafiku atatu apa. Eshi a hovelua okuenda oshikungulu osho tuu osho osho mu shingila mofuta. Omafiku omulongo natano ova telañifua komepo nomakufi. Omepo eshi ja lota okua kendapala okuja komuñgulo. Nande okua enda oule uomafiku ina hanga natango omuñgulo. Oje okua li e shi pamue okua hanga ne ehulilo la Afrika. Oje okua diila (shingila) oskepa vaje koushilo nokua jukifa vali koumbangalañu poñele jokujuka koumbuañu ngashi shito. Oje okua mona edu ope pe na Mosselbaai paife, ope a mona tete ovadaleluamo. Ovadaleluamo okua li va tala ovatiliaane nde tava shingile oimuna javo meni ledu ngashi tava dulu. Oje okua kuñgula fijo ta fiki pu Algoa Baai, ope va dika ongudi imue mokañuñu. Okañuñu aka oke li popepi na Port Elisabeth. Dias okua li ne e shi shi kutja okua li mondjila joku India. Okua li a hala okutukila ope ovashingi vaje va ngongota. Ova li va loloka koluendo lile noikulja ja hovelua okupuapo. Ova li va tala okujja ondjala. Ovo ova li kokule neumbo nondjila jokushuna pamue itave i mono. Ope va hafife Dias ova tukila komesho opomulonga hau ifanua Groot Visrivier. Dias okua li e udite nai okushuna keumbo; Meshuno laje okua inona oshikome shedu osho „Kaappunt” osho ve shi luka „oshikome shoikungulu” shashi ova pitilila po moshikungulu. Ope a dika vali ongudi imue. Konima joluendo luemuedi omulongo nahamano nomafiku omulongo nahejaali okua fika ne mu Lissabon ina mona oshiponga shasha. Otamu dulu okudiladila ehafo lohamba jovaputu apa li fike molu omuendifuta ependa ou, ou a mona ehulo la Afrika nokupitilila oshikome she uja okuifanua „Oshikome shelinekelo liua” osheshi okua li ne ve na elinekelo liua lokufika efiku limue mu Inda Konima jeedula dinini Dias okua pitila vali pu Kaap noshi kungulu osha tukuluka sha ninginifa oskepa novañu ova fila mo.

Tapu tuikilua

OMUHONA OMUPE.

Momuedi gua Juni omuhona omukolantu guokOndangua, Mnr. Blignaut, okua tembuka po a tembukile ku Windhoek. Aauambo oji ipulapula: otatu ka kala ngini, sho tua kucua mbalambala omuhona ngoka tua tameke oku mu igilila naua. Ihe ope tuu mpoka tua mono omuhona omupe, Mnr. Crosman, a zi ku Uniona

Omukuetu ote ja halele ejambeko lja Kalunga ajehe jaali, miilonga jauo iipe.



WALDE KIVINEN.

(Omusamane Manja)

Elaka l'lohodi olje tu aada ombadilila, sho tua kundana oosa domusamane Manja a mana oondjenda de ku Suomi esiku eti 13 lja Juni 1955. Oje a si ombadilila, omu-tima gue gua muena uusiku manga a li molueendo luontumba.

Omboka ju uuyit'uucigua omoluelaka ndika, ojo ojendji shili. Aasitagongalo na-longi ojendji oje na oluhodi olunene, ojo sho ja cigua po komputudi nomukuaci guauo. Oskola jaamati jokEngela itaji vulu okudimbua omusamane Manja, oshoka oje omudiki guajo. Oshifo shetu "Omukue-tu" otashi lili omunjoli omunandunge nomudiginini ngoka a humica oshifo shetu ko-meho.

Omusamane Manja okua aadika peci-mbo ljoonkondo, ina guanica natango oomvula 60. Oje okua kala kOuangbo oomvula 1923-1930, 1934-1939, 1949-1950 na 1953-1955, ano oomvula 15. Oomvula mbali oje okua li i inekelelua iilonga jomukuluntutumua. Ku Suomi oje a likolele oshilonga shetumo ookuume ojendji, unene mokati kaagundjuka. Oje okua njola uo omambo taga hokolola notaga popile etumo. Linjola je miifo joshisuomi kaji shi kujalulua nokuli. Miilonga je ajihe omusamane Manja okua li e nuupenda uokuhamica oshilonga komeho noku shi kokolela oondjila oompe.

Meme Aili Kivinen nojana otatu ja halele oonkondo da Kalunga netalaleko ta li zi kuje.

JUUSO NGAIKUKUETE.

Omuua Kalunga okua icana po omulo-ngeli gue a cike mevululuko ljaana ja Kalunga muukulupe ue, omusitagongalo Juuso Ngaikukuete eti 17 lja Junie 55. Oomvula dokukala kue muujuni oda tengenekua di cike 82.

Oje sho a tembudua kOshitaji; okua tula mOjovu. Nando a kala e nondjila onde okuja kongerki; okua kambadala ngaa okuada ko pecimbo. A kuaca aakulupe aakuauo jokombinga ndjoka okucika kOmu-kulili guauo mesakramenti ejaupuki. E tu popica nohoole ojindji momauvico. Oje a kala mokati ketu ngashika omujapostoli guohoole. Mu je mua monika eiifupipiko olindji, tse atuhe tatu li pumbua. Oje a longo nuudiginini oskolakoleko. Oskola ndjika okue ji diginine sigo opokusa kue. -

Omukululupe nguka ecimbo alihe ndjoka a kala mokati ketu, okua kala omumvuntu. Olutu lue olua kamua kuuvu sigo opehulilo lje. Tse inatu uva ekemo lje neloloko ljetegelelo mu je, tua tala ashike omeho ge guud'ohoole.

Pombila je pua cikama ongundu onene jaacindikili je, moka mua li uo aatumua ja hamano naasitagongalo ja ne. Omukuluntutumua guetu a pe omusitagongalo D. Shihapo ompito jeuvico ljejumviko.

Aasitagongalo aakuauo ja peua uo ompito okulesha omatumbulo moramata ondjapuki. Omukuluntutumua a japula ombila manga taa imbi. Oongala odindji aacindikili oje di eta, da umbilua nomoshilambo uo; na dimue da tulua uo kombanda jombila.

Ohatu pandula ovahongi va Ryns Sending ve uja ku C. D. M. mocompound North 2. Omua shashua ovamati 27 mua kolekua 38. Eshi ohatu pandula. Omuene ota kongo ava vaje. Omuene nonena ota ende ta kongo mo vaje v'ehene kuje kouhamba. Fimbo pepi.

Ovaitaveli nje omaindilo eni naafike koshipala shomuene omikunda dihapu ovapaani veja dimo ovashunimonima katu na navo inava hala okupuilikina evangeli la Jesus. Laninga oulai kuvo. 1. Korint 1: 18-28.

Mu tu dimbulukue jo ava tuli mehalakano.

Jason Namila.
Orangemouth North 2.

OMUKUAKRISTUS.

Omukriste guashili eendacano lje na Kristus oljo egalikano

Natu dimbulukue epuko enene li li mokati ketu unene tuu mboka hatu kala kuushimba kookomboni.

Aantu ja komboni ngele taa li ohaa li ouala ja fiimuna, nokulala okupenduka osho uo.

Lja iikulja nokupandula Kalunga u peue ejambeko. Penduka e to galikana u peue oonkondo oonpe u peue shoka ue shi pumbua no u gamenue kiiponga. Tu kondje nokuinekela Omuua.

Esiku limue nda ka talela po oojakuetu, shono iikulja je ja pokati onda ti tu galikaneni. Gumue okua ti: Oguu peni ta popi oohapu di cike mpano. Nomukuauo okua ti: Oombono jomcohofa eeno shili. Ondika epuko enene shili kutseni, oshoka aantu mbaka haa ningi ageji ojo naa naa aakriste.

Omuua ando e tu kuace ombepo ja tja ngeji ji ze mo mutse.

D. Aron.



EENDJOVO

omuvelo ueendjovo ue ku jeulukila, ehafo loje la pua ngashi Johannes ta ti moteksti jetu. Ove to hafele ongenda nohole ja Jesus. Ndelene ehafo nelao loje itali ku efa u likalele, ahoue, To ningi ngashi Johannes a ninga. To ka udifa evangeli kovakueni ve li momulaulu natango va mone jo omuenjo opo nje amushe mu shiive okuhafela pamue chole ja Kalunga mu, Jesus mOmukulili uetu.

Oshivilo sha Missioni otashi tu kumaida jo tu konge omuenjo mu Jesus Kristus ndele tu udifile ovapaani novashunimonima evangeli ofje atushe tu kale pamue nde tu kale meandafano pamue na Tate nomona uaje Jesus. Ehafo letu la pua eshi hatu mono ovakuetu avesho hava ende needjila da Kalunga. Molu elombuelo la Jesus nehafo eli, ehafo lovakuaneulu, hatu udifa eendjovo domuenjo. Omeulu nomedu mokati ketu omu nehafo eshi eendjovo domuenjo hadi udifua novafu ohava mono omuenjo mudo.

3. Eudifo letu nokukalamuenjo kuetu.

Okua li omukriste umue ou kuje kua tilue: „Okukalamuenjo kuaje haku popi

unene ku dule okupopja kuaje". Ondjovo ei ja hala oku tu lombuela: Ovañu ihava itavele eendjovo detu ngenge okukalamuenjo kuetu taku holola kutja ihatu kala noihatu ningi ngashi hatu popi. Ngenge hatu popi eendjovo da Kalunga ndelene mehokelele otu hole oulunde, hatu kala mounjuni nohatu longo oilonga jao otu li ovafufi novanaihelele ashike. Vahapu vomovakriste vetu ve li ngaha nde moluasho oukriste uetu kau neengono neendjovo detu ka di nomuenjo di pe ovañu omuenjo.

Onena ohatu lombuelua keendjovo detu: tu nokuenda paudiofio tue li uda nohatu li udifa. 1 Joh. 5-6. „Eendjovo deudifo. otue di peua ku Jesus ndele otue di mu udifila odedi: Kalunga oje oujelele. Omulaulu kau mo mu je. Ngenge hatu ti otu li pamue naje ndele ohatu ende momulaulu osho hatu fufja ndele ihatu longo eshi oshili". - Kalunga oje oujelele, tashi ti: ovo va dalua ku Kalunga ve nokuenda moujelele. Omulaulu kau mo nu Kalunga. Omulaulu kau mo mu ovo va dalua, ku Kalunga. Ndelene ngenge hatu tale okukalamuenjo kuetu hatu mono shihapu osho shomulaulu. Ofje ovakriste: Tu djeni mo momulaulu. Mu Kalunga ka mu nomu-

lailu. Tu efeni oulunde. Ngenge tu hole oulunde ka tu na ko na sha na Kalunga.

Eshi hatu diladila mohani ei oshilonga shetumo medu eli oshinima shotete tu noku shi ninga osheshe: tu djeni momulaulu, tu efeni oilongu jomomulaulu, ofje ovakriste, ofje ovakuaneongalo. Oitashi kuafa sha ngenge hatu litula neengono detu adishe moshilonga sha Kalunga ndelene pefimbo tuu olo otu hole oulunde nohatu longo oilonga jomulaulu. Eendjovo detu ka di shi okuitavelua nokutambalua kovapaani ngenge ofje vene ihatu longo oshili moukriste uetu. Ove omukriste, ngenge to efa oikolui-fa, ngenge to efa ohole joipala, ngenge to efa oipupulu, ngenge to efa etondafano osho nosho oto ka mona numbi oshilongo sha Kalunga tashi humu ko komesho ngashe inashi ninga nale. Oto mono jo ongenda nombili ja Kalunga mokukalamuenjo kuoji muene nomeandafano lovakriste ngashi ino shi mona nale, osheshi: ngenge hatu ende moujelele ngashi oje Kalunga ta kala moujelele, opo hatu andafana ndele phonde ja Jesus Kristus, omona uaje, otai, tu kosho ku keshe etimba.

U. P.